

BAB

1

NILAI TERAS DAN PRINSIP ASAS NEGARA MADANI

Hafiza Abas dan Zilal Saari

1.1 PENGENALAN

Negara MADANI merupakan satu konsep yang menekankan transformasi masyarakat melalui penglibatan aktif dalam proses pembangunan dengan dasar dan pelaksanaan yang berasaskan maklum balas daripada rakyat. Konsep ini juga mencerminkan evolusi sistem undang-undang yang mendukung penglibatan aktif masyarakat dalam kehidupan berbangsa dan bernegara (Feldman et al., 2021).

Misi kerajaan MADANI di Malaysia adalah untuk mentransformasikan Malaysia menjadi sebuah negara yang lebih makmur dan maju, berteraskan nilai Malaysia MADANI melalui kepercayaan antara kerajaan dan rakyat, dasar ketelusan dan kerjasama. Hal ini selaras dengan visinya, iaitu “Mencorak masa hadapan Malaysia dengan segala potensi yang ada, dengan mengambil kira segala bentuk perubahan yang mengubah dunia, dan beraspirasi untuk mengemudi Malaysia dalam era pasca normal yang serba rumit melalui laras bahasa, konsep, dan budaya kearifan tempatan”.

Konsep negara MADANI turut merujuk kepada peranan undang-undang dalam mengalakkan keterlibatan masyarakat dalam kehidupan berbangsa dan bernegara secara efektif dan adil (Feldman et al., 2021). Dalam konteks sejarah Islam, fasa Madani dalam sejarah Islam

menunjukkan bagaimana Nabi Muhammad SAW melaksanakan pelbagai tugas seperti dakwah, rundingan, pembelaan, pendidikan, pendamaian, kepimpinan, dan memainkan peranan sebagai ketua negara (Omer et al., 2019). Piagam Madinah juga dianggap sebagai piagam perdamaian yang menyatukan suku-suku yang sering berselisih, berasaskan prinsip demokrasi dan kemanusiaan (Ibrahim et al., 2020).

Konsep ini berteraskan nilai-nilai Islam dan bertujuan melahirkan masyarakat yang harmoni, adil, dan sejahtera. Bab ini akan meneroka konsep negara MADANI dalam konteks masyarakat moden, dengan mengenal pasti enam nilai teras utama, prinsip-prinsip dasar serta cadangan pelaksanaan.

1.2 NEGARA MADANI DALAM MASYARAKAT MODEN

Negara MADANI dalam konteks Malaysia melibatkan transformasi masyarakat ke arah penglibatan yang lebih aktif dalam pembangunan dan pembentukan dasar negara. Konsep ini juga merangkumi evolusi sistem perundangan untuk menyokong penglibatan masyarakat dalam kehidupan berbangsa dan bernegara. Dalam konteks Malaysia, konsep negara MADANI dapat dilihat dari perspektif pembangunan industri pertahanan yang menekankan prinsip berdikari, di mana pembangunan dan keselamatan negara perlu didasarkan pada kemampuan sendiri tanpa terlalu bergantung kepada bantuan luar (Batau et al., 2022).

Selain itu, dalam konteks politik Malaysia, peralihan kuasa politik, terutama peralihan jawatan Perdana Menteri, masih berlaku dalam kerangka demokrasi berparlimen dan raja berperlembagaan (Ationg et al., 2020). Konsep negara MADANI juga merangkumi aspek keselamatan negara, di mana persaingan kuasa memainkan peranan penting dalam membentuk sistem pertahanan negara (Mohamed et al., 2021).

Dalam konteks media di Malaysia, terdapat perubahan dalam indeks kebebasan media yang menunjukkan penurunan, yang mencerminkan cabaran dalam mengekalkan kebebasan media di negara ini (Yow, 2014). Selain itu, dalam konteks multikulturalisme, Malaysia berhadapan dengan

batasan pendekatan legal-formal dalam mewujudkan masyarakat berbilang budaya (Akbar & Asworo, 2019).

Dengan demikian, konsep negara MADANI di Malaysia mencakupi pelbagai aspek, daripada penglibatan masyarakat dalam pembangunan negara sehingga aspek keamanan negara, peralihan kuasa politik, kebebasan media, dan cabaran multikulturalisme. Semua ini menunjukkan kekompleksan transformasi ke arah negara MADANI yang melibatkan pelbagai aspek kehidupan berbilang dan bernegara di Malaysia.

1.3 NILAI TERAS MALAYSIA MADANI

Malaysia MADANI berteraskan enam nilai utama yang menjadi panduan ke arah pembangunan masyarakat inklusif, progresif, dan harmoni, sejajar dengan aspirasi negara maju dan berperikemanusiaan.

1.3.1 Kemampanan

Kemampanan, atau *sustainability*, merujuk kepada konsep di mana suatu program, intervensi klinikal, atau strategi implementasi terus disampaikan dan perubahan perilaku individu dikekalkan selepas tempoh waktu tertentu. Konsep ini juga merangkumi adaptasi, pembelajaran dan pembangunan mampan, serta terus memberikan manfaat kepada individu atau sistem sambil terus berevolusi atau beradaptasi (Moore et al., 2017).

Konsep kemampanan juga dapat dilihat dalam konteks pembangunan industri pertahanan di Malaysia, di mana prinsip berdikari (*self-reliance*) menjadi kunci dalam memastikan kemampanan pembangunan dan keselamatan negara. Selain itu, dalam konteks perumahan di Malaysia, usaha untuk mengukuhkan kemampanan sektor perumahan melibatkan anjakan paradigma dalam hal pemilikan rumah, pendidikan kewangan, kawalan harga rumah, dan pengukuhan sektor penyewaan (Hamzah & Ismail, 2018).

Justeru, konsep kemampanan merangkumi aspek seperti kelangsungan program, keupayaan adaptasi, manfaat yang diperoleh,